

1882 - Préf. Ma garbeto de Nouvè - R. P. X. de Fourvière

Souvenènço

Quand li clàri campano de l'abadié de Sant-Michèu dindavon eilamont dins la Mountagneto de Ferigoulet, anavian, de fes que i'a, passa noste dimenche au mounastié di Paire Blanc. Intravian au valoun de Roco-Pèd-de-Biòu, e remountant lou gaudre tout redoulènt de ferigoulo, arribavian en aut au segound de la messo.

Tout lou planet de Sant-Michèu s'emplissié de bràvi gènt vengu de l'enviroun, e mai-que-mai de galànti chato d'Arle, de Sant-Roumié, de Gravesoun, de Barbentano, e di vilage d'aperaqui. Pièi quand sounavo lou darrié, s'intravo dins la glèiso brihantamen aluminado, e vesian tout d'un cop dos l'ongui tiero de mounge blanc se gandi, lou front clin, à travès di coulouno, e mounta, l'un après l'autre, dins li fourmo dóu Cor tout resplendènt d'or e de lume.

Aqui n'i'avié de vièi emé lou su pela; n'i'avié dins la forco de l'age ; n'i'avié de jouinas emai de jouinet; n'i'avié qu'èron d'enfant e que cantavon coume d'ange; e tóuti emé la raubo de lano blanquinello, e tóuti encourouna de la tounsurò mounastico.

Em' acò se cantavo meraviousamen li lausenjo de Diéu, emé l'acoumpagnamen de l'ourgueno majestouso; la voues di jouine se crousavo armouniousamen emé la voues di vièi; aquelo dis enfant musiquejavo paradisenco; e pièi, après l'oufice, lou venerable Paire Eimound, emé soun grand rauquige bèn couneigu de tóuti, largavo à-n-aquéu pople uno longo benedicoun.

E me disiéu de fes, en vesènt l'esplendour d'aquéli fèsto catoulico: Es pas poussible que noun i'ague, dins aquelo proucessioun d'amo sereno e religiouso, un pouèto, un felibre, que mete en vers piouso li pantai de la clastro, li vesiou de la celulo, lis embriagadisso de l'encèn !

E li pouèto i'èron, e lou felibre i'èro ; car se noun èro aqui la pouèsio, ounte sarié?

Aro que la tempèsto a fa teisa l'ourgueno e amoussa li cire, aro que lou couvènt es barra sus la mountagno, s'entènd plus dins lis erme que lou piéu-piéu dis auceloun, di pàuris auceloun escavarta pèr la chavano.

Aquest libre de novè es lou piéu-piéu de l'auceloun ; es lou cant d'un felibre qu'a passa sa jouvènço dins lou couvènt de Ferigoulet. Lou paure couventiau pòu plus canta dins sa capello... mai quau pòu empacha l'aucèu de l'erme de canta dins l'azur la glòri dóu bon Diéu?

F. Mistral

Maiano, 12 d'avoust 1882

© CIEL d'Oc – 2009